

Rā 5, Te Whakaaturanga o tō tātou Ariki – Rāpare/Tāite i te ahiahi

He Karakia mō ngā Rāapa/Wenerei o te "Wā noa iho", o ia rā rānei o te wā o te Whānautanga

Ka haere mai a Īhu ki Kāriri, ka kauwhau i te rongopai o te Atua ka mea, "Kua rite te wā, kua tata hoki te rangatiratanga o te Atua; rīpenetā, whakaponohia te rongopai."

Maka 1.14b, 15

E te Kaitiaki o ngā mea katoa
Te tīmatanga o te whakaaro rangatira
Te taumata o ngā taumata katoa
Te Kaitohutohu kawenata
E pono ai mātou
Ki ō mātou anō kupu.
Meinga kia maranga ake mātou
Ki ngā mea tika o tēnei ao
Kia puta te ihi te wehi te tapu
I waenganui i te iwi whānui
Ngā hua o te tino rangatiratanga
Me te oranga tonutanga
E kore nei e memeha. **Āmine.**

Te Kupu a te Atua

*Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei, **Korōria ki . . .***

Te Wiki tuatahi, me ngā Rātapu o te Whakaaturanga – Waiata 72

- 1 Hōmai, e te Atua, āu whakaritenga ki te kīngi, •
me tōu tika ki te tama a te kīngi.
- 2 Māna e whakawā tōu iwi i runga i te tika, •
āu rawakore i runga i te whakawā tika.
- 3 Ka kawea mai e ngā maunga te rongo mau ki te iwi, •
e ngā pukepuke i runga i te tika.
- 4 Ka whakawā ia mō ngā ware o te iwi; •
ka whakaorangia e ia ngā tamariki a te rawakore;
mongamonga noa i a ia te kaitūkino.
- 5 I te rā e mau ana, i te marama hoki, •

- ka pērā te mau o tō rātou wehi ki a koe i ngā whakatupuranga katoa.
- 6 E heke iho ia ānō he ua ki runga ki te kotinga tarutaru, •
me ngā ua e whakamākūkū nei i te whenua.
- 7 Ka tupu te tangata tika i ōna rā; tōna roa anō o te āta noho, •
ā, kore noa te marama.
- 8 Ka kīngi ia i tēnei moana, ā tae noa ki tētahi moana, •
i te awa, ā ngā pito atu anō o te whenua.
- 9 Ka piko ki tōna aroaro te hunga o te koraha; •
ā, ka mitimiti ōna hoariri i te puehu.
- 10 Ka maua mai he hākari e ngā kīngi o Tarahihi, o ngā motu; •
ka kawea mai he tahua e ngā kīngi o Hēpā, o Tēpa.
- 11 Āe, ka koropiko ngā kīngi katoa ki a ia; •
ka mahi ngā iwi katoa ki a ia.
- 12 Ka ora hoki i a ia te rawakore ua tangi atu, •
te ware hoki me te tangata kāhore nei ōna kaiāwhina.
- 13 E tohu ia i te tangata iti, i te rawakore; •
ka ora anō i a ia ngā wairua o ngā rawakore.
- 14 Ka hokona e ia tō rātou wairua i roto i te tūkinu, i te tutū, •
he mea utu nui hoki ō rātou toto ki tāna titiro.
- 15 Ā, e ora rātou! Ka hoatu anō ki a ia he kōura nō Hēpā. •
Ka tukua tonutia hoki te īnoi mōna; ka whakapaingia ia
i tēnei rā, i tēnei rā.
- 16 He kutanga wīti tērā i runga i te whenua, i te tihi o ngā maunga;
ngarue ana ōna hua, ānō ko Repanōna, •
ā, ka rite te tupu o ngā tāngata o te pā ki tō te tarutaru o te whenua.
- 17 Ka mau tonu tōna ingoa ake ake; ka rite tōna ingoa ki te rā te pūmau. •
Kei roto i a ia te manaaki mō te tangata;
ka kōrerotia tōna koa e ngā iwi katoa.
- 18 Kia whakapaingia a Ihowā, te Atua, te Atua o Īharaira; •
ko ia nei anake hei mahi i ngā mahi whakamīharo.
- 19 Kia whakapaingia anō tōna ingoa korōria mō ake tonu atu; •
kia kī katoa hoki te whenua i tōna korōria. Āmine, āe Āmine.

Te Wiki tuarua, me ngā Rāhina/Mane o te Whakaaturanga – Waiata 48

- 1 He nui a Ihowā, kia nui hoki te whakamoemiti ki a ia
i te pā o tō tātou Atua, •
i te maunga o tōna tapu;
- 2 ātaahua ana te tairanga o Maunga Hiona, ko tā te ao katoa e koa ai; •

- kei te taha ki te raki te pā o te Kīngi nui.
- 3 E mātauria ana te Atua •
i roto i ōna whare papai hei piringa.
- 4 Nā, huihui tahi mai ana ngā kīngi, •
haere tahi atu ana rātou.
- 5 I kite rātou, mīharo iho; •
raruraru ana, hohoro tonu atu.
- 6 Pā ana te wehi ki a rātou i reira, te mamae, •
ānō he wahine e whānau ana.
- 7 E wāhia ana e koe ngā kaipuke o Tarahihi •
ki te marangai.
- 8 Rite tonu ki tā mātou i rongō ai,
tā mātou i kite ai i roto i te pā o Ihowā o ngā mano,
i te pā o tō tātou Atua; •
mā te Atua e whakapūmau ake ake.
- 9 I whakaaroaro mātou ki tōu atawhai, e te Atua, •
i waenganui o tōu temepara.
- 10 E te Atua, rite tahi ki tōu ingoa te whakamoemiti mōu,
tae noa atu ki ngā pito o te whenua; •
kī tonu tōu matau i te tika.
- 11 Kia hari a Maunga Hiona, •
kia koa ngā tamāhine a Hūrā i āu whakaritenga.
- 12 Taiāwhiotia a Hiona, haere, ā kōpiko noa mai; •
taua ōna pourewa,
- 13 maharatia ōna pekerangi, tirohia ōna whare papai; •
hei kōrerotanga mā koutou ki ēnei ake whakatupuranga.
- 14 Ko tēnei Atua hoki te Atua mō tātou ake ake. •
Ko ia hei kaiārahi i a tātou ā mate noa.

Te Wiki tuatoru, me ngā Rātū/Tūrei o te Whakaaturanga – Waiata 122, 117

- 1 I koa ahau i tā rātou meatanga mai ki ahau, •
“Tātou ka haere ki te whare o Ihowā!”
- 2 E tū ana ō mātou waewae ki ōu tatau, •
e Hiruhārama.
- 3 Ko te hangānga o Hiruhārama, •
rite tonu ki tō te pā kua tūhonohonoa ki a ia anō.
- 4 Hāereere ana ki reira ngā iwi, ngā iwi o Ihowā,
ki tō Iharaira whakaaturanga, •

- ki te whakawhetai ki te ingoa o Ihowā.
- 5 Kua whakatūria hoki ki reira ngā torōna whakawā, •
ngā torōna o te whare o Rāwiri.
- 6 Īnoia he āta noho mō Hiruhārama: •
“Ka whiwhi ki te pai te hunga e aroha ana ki a koe.
- 7 Kia mau te rongō ki ōu taiepa, •
me te pai ki ōu whare kīngi.”
- 8 He mea mō ōku tēina, mō ōku hoa, tāku e mea nei, •
“Kia mau te rongō ki roto ki a koe.”
- 9 He whakaaro ki te whare o Ihowā, o tō tātou Atua, •
ka rapu ahau i te pai mōu.
- 10 Whakamoemititia a Ihowā, e ngā tauwiwi katoa! •
whakamoemititia ia, e ngā iwi katoa!
- 11 He nui hoki tāna mahi tohu ki a tātou; •
e mau ana hoki te pono o Ihowā ake ake. Whakamoemititia a Ihowā!

Te Wiki tuawhā, me ngā Rāapa/Wenerei o te Whakaaturanga – Waiata 81

- 1 Kia kaha te waiata ki te Atua, ki tō tātou kaha; •
kia hari te hāmama ki te Atua o Hākopa.
- 2 Whakahuatia te hīmene, maua mai ki konei te timipera, •
te hāpa reka me te hātere.
- 3 Whakatangihia te tētere i te kōwhititanga marama, •
i te kīnga o te mārama, i tō tātou rā hākari.
- 4 Ko te tikanga hoki tēnei mā Īharaira, •
he mea whakarite nā te Atua o Hākopa.
- 5 I whakatakotoria tēnei e ia mā Hōhepa hei whakaaturanga,
i tōna haerenga puta noa i te whenua o Īhipa. •
I rongō ai ahau ki reira i tētahi reo, kāhore ahau i mātau:
- 6 “I tangohia mai e ahau tōna pokohiwi i te pīkaunga; •
whakarērea ake e ōna ringa te kete.
- 7 I karanga koe ki ahau i te pōuritanga, ā, kua ora koe i ahau; •
i whakahoki kupu ahau ki a koe i te wāhi ngaro o te whatitiri;
i whakamātau i a koe ki ngā wai o Meripa.
- 8 ‘Whakarongo, e tāku iwi, ā, ka whakaatu ahau ki a koe; •
e Īharaira, ki te whakarongo koe ki ahau!
- 9 Aua tētahi atua kē i roto i a koe; •
kaua anō e koropiko ki te atua kē.
- 10 Ko Ihowā ahau, ko tōu Atua, i ārahina mai ai koe i te whenua o Īhipa. •

Kia nui te kowhera o tōu māngai, ā, māku e whakakī.’

- 11 Otiia, kīhai tāku iwi i pai ki te whakarongo ki tōku reo; •
kīhai anō a Īharaira i aro ki ahau.
- 12 Nā, tukua atu ana rātou e ahau ki te mārō o ō rātou ngākau; •
ā, haere ana rātou i runga i ō rātou whakaaro.
- 13 Auē, te whakarongo tāku iwi ki ahau, •
te haere a Īharaira i āku ara!
- 14 Pēnei e kore e aha kua whati i ahau te tara o ō rātou hoariri; •
kua tahuri anō tōku ringa ki ō rātou hoariri.
- 15 Ko te hunga e kino ana ki a Ihowā kua ngohengohe ki a ia, •
ko tō rātou tāima ia kua mau tonu.
- 16 Kua whāngainga hoki rātou e ia ki te wīti pai rawa, •
kua whakamākonatia anō koe e ahau ki te honi i roto i te kōhatu.”

Te Wiki tuarima, me ngā Rāpare/Tāite o te Whakaaturanga – Waiata 98

- 1 Waiatatia ki a Ihowā he waiata hou; he mahi whakamīharo hoki āna. •
Nā tōna ringa matau, nā tōna ringa tapu, i taea ai e ia te whakaora.
- 2 Kua whakakitea e Ihowā tāna whakaoranga, •
kua whakapuakina e ia tōna tika ki te aroaro o ngā tauīwi.
- 3 Kua mahara ia ki tāna mahi tohu, ki tōna pono ki te whare o Īharaira; •
ā, kua kite ngā pito katoa o te whenua i te whakaoranga a tō tātou Atua.
- 4 Kia hari te hāmama, e te whenua katoa, ki a Ihowā; •
hāmama, kia hari, āe rā, hīmene atu.
- 5 Hīmene ki a Ihowā i runga i te hāpa; •
i runga i te hāpa, me te hīmene anō te reo.
- 6 I runga i te tētere, i te tangi anō o te koronete; •
kia hari te hāmama ki te aroaro o Ihowā, o te Kīngi.
- 7 Kia haruru te moana me ngā mea e hua ana i roto; •
te ao me ōna tāngata e noho ana i runga.
- 8 Kia papaki ngā ringa o ngā roma, •
kia hari tahi ngā pukepuke.
- 9 Ki te aroaro o Ihowā, e haere mai ana hoki ia ki te whakawā mō te whenua. •
Ka whakawā ia mō te ao i runga i te tika, mō ngā iwi hoki i runga i te pono.

Te Wiki tuaono, me ngā Rāmere/Paraire o te Whakaaturanga – Waiata 36

- 1 E mea ana te mahi kino a te tangata hara i roto i tōku ngākau, •
kāhore he wehi ki te Atua i mua i ōna kanohi.
- 2 E whakapai ana hoki ōna kanohi ake ki a ia anō, •

- e kore e kitea tōna hara, e kore e kinongia.
- 3 He kino ngā kupu a tōna māngai, he rauhanga hoki, •
kua mahue i a ia te mahara, te mahi i te pai.
- 4 He mahi nanakia tāna e whakaaro ai i runga i tōna moenga; •
ehara i te pai te ara e tūria ana e ia, kāhore ōna whakarihariha ki te kino.
- 5 Kei ngā rangi, e Ihowā, tāu mahi tohu; •
tutuki noa atu tōu pono ki ngā kapua.
- 6 Rite tonu tōu tika ki ngā maunga o te Atua; he rire nui āu whakaritenga; •
ko koe, e Ihowā, te kaiwhakaora i te tangata, i te kararehe.
- 7 Anō te pai o tōu aroha, e te Atua; •
ka okioki ngā tama a te tangata i raro i te taumarumarutanga iho o ōu pākau.
- 8 Ka mākona rātou i ngā mea mōmona o tōu whare; •
ka whakainumia anō e koe ki te awa o āu mea whakahari.
- 9 Kei a koe hoki te puna o te ora; •
mā tōu mārāma ka kite ai mātou i te mārāma.
- 10 Kia roa tōu aroha ki te hunga e mātau ana ki a koe, •
tōu tika hoki ki te hunga ngākau tika.
- 11 Kei puta mai ki ahau te waewae whakapakari; •
kei āia atu ahau e te ringa o te hunga hara.
- 12 Hinga iho i reira ngā kaimahi i te kino; •
kua turakina iho, tē āhei te ara ake.

Te Wiki tuawhitu, me ngā Rāhoroi/Hātarei o te Whakaaturanga – Waiata 46

- 1 Ko te Atua tō tātou piringa, tō tātou kaha; •
he kaiāwhina e tino tata ana i ngā wā o te hē.
- 2 Nā reira kore ake tō tātou wehi, ahakoa nekehia te whenua, •
ahakoa kāhakina ngā maunga ki waenga moana;
- 3 ahakoa rarā, taupatupatu noa ōna wai, •
ahakoa wiri ngā maunga i tōna huamo.
- 4 He awa tēnā ko ōna manga hei whakahari i te pā o te Atua, •
i te wāhi tapu o ngā tapenākara o te Runga Rawa.
- 5 Kei waenganui ōna te Atua, e kore ia e whakakorikoria; •
mā te Atua ia e āwhina i te putanga anō o te ata.
- 6 I nana ngā tauwiwi, i whakakorikoria ngā rangatiratanga; •
puaki ana tōna reo, rewa ana te whenua.
- 7 Kei a tātou a Ihowā o ngā mano, •
ko te Atua o Hākopa tō tātou piringa.
- 8 Haere mai, tirohia ngā mahi a Ihowā, •

ngā whakangaromanga i whakaputaina e ia ki te whenua.

- 9 E whakamutua ana e ia ngā whāinga ā te pito rā anō o te whenua; •
whati ana i a ia te kōpere, poro pū te tao,
tahuna ake e ia te hāriata ki te kāpura.
- 10 “Kia āta noho, ā, kia mātau ko ahau te Atua; •
e whakanuia ahau i waenganui i ngā tauiwī,
e whakanuia ahau i te whenua.”
- 11 Kei a tātou a Ihowā o ngā mano; •
ko te Atua o Hākopa tō tātou piringa.

*Waiata Whakamoemiti nā te Kawenata Tawhito
ko tēnei*

Waiata Whakamoemiti tuatahi

- 1 Whakarongo, e ngā motu, ki ahau; •
kia whai whakaaro, e ngā iwi o tāwhiti!
- 2 No te rā manakohanga atu i whakahoki kupu ai ahau ki a koe, •
nō te rā whakaora hoki i āwhinatia ai koe e ahau; māku anō koe e tiaki,
- 3 hei whakaara i te whenua, •
hei mea kia nohoia ngā kainga tupu kua ururuatia;
- 4 hei mea ki ngā herehere, •
‘Haere,’ ki te hunga i te pōuri, ‘Whakaatu i a koutou.’
- 5 Ka kai rātou ki ngā ara, •
ka ai hoki he wāhi kai mā rātou ki ngā pukepuke katoa.
- 6 E kore rātou e matekai, e kore anō e matewai, e kore hoki te werawera, •
te rā rānei, e pakakinakina ki a rātou;
- 7 nō te mea ko tō rātou kaiatawhai hei ārahi i a rātou; •
māna hoki rātou e ārahi ki ngā puna wai.
- 8 Waiata, e ngā rangi, kia hari hoki, e te whenua; •
kia pakaru mai tā koutou waiata, e ngā maunga!
- 9 Ka whakamārie hoki a Ihowā i tāna iwi, •
ka aroha hoki ki āna kua tūkinotia nei.

Ihāia 49.1, 8-10, 13

Korōria ki . . .

ko tēnei rānei

Waiata Whakamoemiti tuarua

- 1 E ara, kia mārama; kua tae mai hoki tōu mārama, •
kua whiti te korōria o Ihowā ki a koe.

- 2 Tērā hoki e hipokina te whenua e te pōuri, •
ngā iwi e te pōuri kerekere;
- 3 ka whiti ia a Ihowā ki a koe, •
ka kitea hoki ki a koe tōna korōria.
- 4 Ā, ka haere mai ngā tauīwi ki tōu mārāma, •
ngā kīngi ki ōu hihi, ina whiti mai.
- 5 E kore e rangona i muri te mahi nanakia ki tōu whenua; •
te whakamōtī, te wāwāhi, ki ōu rohe;
- 6 engari ka kīia ōu taiepa, ko te Whakaoranga, •
ōu kuwaha ko te Whakamoemiti.
- 7 E kore te rā e waiho i muri hei whakamārāma mōu i te awatea; •
nā, ko te marama e tīaho nei, e kore tērā e whakamārāma i a koe;
- 8 ko Ihowā hoki hei whakamārāma mōu ake ake, •
ko tōu Atua hoki hei whakakorōria i a koe.

Ihāia 60.1-3, 18-19

Korōria ki . . .

Ngā Pānui Karaipiture

ko tētahi o ēnei pānui, ko tētahi nō te Maramataka o te tau rānei

Te Wiki tuatahi, me ngā Rātapu o te Whakaaturanga

Ā, i a rātou e kai ana, ka mau a Īhu ki te taro, ā, ka mutu te whakapai, ka whawhati, nā, ka hoatu ki a rātou, ka mea, “Tangohia, kainga: ko tōku tinana tēnei.” Nā, ka mau ia ki te kapu, ā, ka mutu te whakawhetai, ka hoatu ki a rātou; ā, ka inumia e rātou katoa. Ā, ka mea ia ki a rātou, “Ko ōku toto ēnei, ko ō te kawenata hou, e whakahekea ana mō te tini. He pono tāku e mea nei ki a koutou, E kore ahau e inu atu anō i te hua o te wāina, kia taea rā anō taua rā e inumia houtia ai e ahau i te rangatiratanga o te Atua.”

Māka 14.22-25

Te Wiki tuarua, me ngā Rāhina/Mane o te Whakaaturanga

“Haere mai koutou, tātou ka haere ki runga ki te maunga o Ihowā, ki te whare o te Atua o Hākopa, ā, māna tātou e whakaako ki āna ara; ka haere hoki tātou i āna huarahi.” Nō te mea ka puta mai te ture i Hiona, te kupu hoki a Ihowā i Hiruhārāma. Ā, ka whakarite whakawā ia i waenganui i ngā iwi maha, ka rīria hoki e ia te hē o ngā iwi kaha i tawhiti; ā, ka patupatua e rātou ā rātou hoari hei hea parau, ā rātou tao hei mea tapahi manga. E kore tētahi iwi e hāpai hoari ki tētahi iwi, ā, heoi anō tā rātou ako ki te whawhai. Engari, ka noho

rātou, ia tangata, ia tangata, i raro i tāna wāina, i raro i tāna piki; ā, kāhore he tangata hei whakawehi i a rātou; nā te māngai hoki o Ihowā o ngā mano te kōrero. Ka haere hoki ngā iwi katoa, ia tangata, ia tangata, i runga i te ingoa o tōna atua, ā, ka haere tātou i runga i te ingoa o Ihowā, o tō tātou Atua ā ake ake.”

Mika 4.2b-5

Te Wiki tuatoru, me ngā Rātū/Tūrei o te Whakaaturanga

Ka mea a Īhu, “Nā, ko te tangata e rongō ana ki ēnei kupu āku, e mahi ana hoki, ka whakaritea e ahau ki te tangata mahara, i hanga i tōna whare ki runga ki te kāmaka. Ā, ka ua te ua, ka puta ngā waipuke, ka pupuhi ngā hau, te tino ākinga ki taua whare, kīhai hoki i hinga, nō te mea i hangā ki runga ki te kāmaka. Ā, ko te tangata e rongō ana ki ēnei kupu āku, ā, kāhore e mahi, ka whakaritea ki te tangata whakaarokore i hanga i tōna whare ki runga ki te onepū. Nā, ka ua te ua, ka puta ngā waipuke, ka pupuhi ngā hau, ā, pā ana ki taua whare, nā, kua hinga. He rahi anō tōna hinganga!”

Matiu 7.24-27

Te Wiki tuawhā, me ngā Rāapa/Wenerei o te Whakaaturanga

He teka hoki ko mātou te kauwhautia nei e mātou, engari, ko Karaiti Īhu hei Ariki, ā, ko mātou nei hei pononga mā koutou, he whakaaro ki a Īhu. Ko te Atua hoki nāna nei i kī te mārama kia whiti i roto i te pōuri, kua whiti ki roto ki ō mātou ngākau, hei hōmai i te mārama o te mātauranga o te korōria o te Atua i te mata o Īhu Karaiti.

2 Koroniti 4.5-6

Te Wiki tuarima, me ngā Rāpare/Tāite o te Whakaaturanga

Nā, ka mea a Īhu ki a Haimona, “E kite ana koe i tēnei wahine? I haere mai ahau ki roto ki tōu whare, kāhore i hōmai e koe he wai mō ōku waewae; nāna ia i whakamākūkū ōku waewae ki ōna roimata, ā, murua iho ki ngā makawe o tōna mātenga. Kīhai koe i kihi i ahau; tēnā ko ia, mai o tōku taenga mai, kāhore anō i tāmutu te kihi o ōku waewae. Kīhai koe i whakawahi i tōku mātenga ki te hinu, nāna ia ōku waewae i whakawahi ki te hinu. Koia ahau ka mea nei ki a koe, kua murua ōna tini hara; he nui hoki tōna aroha; ko te tangata ia he iti ngā mea i murua ka iti anō tōna aroha.”

Ruka 7.44-47

Te Wiki tuaono, me ngā Rāmere/Paraire o te Whakaaturanga

“Kei runga i ahau te Wairua o te Ariki, o Ihowā; nā Ihowā nei hoki ahau i whakawahi hei kauwhau i te rongopai ki te hunga māhaki. Kua ungā mai ahau e ia ki te takai i te hunga ngākau marū, ki te kauwhau ki ngā whakarau kia haere noa, ki ngā herehere, kua tuwhera te whare herehere; kia karangatia te tau manako mai o Ihowā, te rā rapu utu o tō tātou Atua; kia whakamārietia te hunga katoa e tangi ana; kia whakatakotoria he tikanga mō te hunga katoa o Hiona e tangi ana, kia whakaputaia kētia o rātou pungarehu hei ātaahua, te tangihanga hei hinu koa, te wairua pōuri hei kākahu whakamoemiti; ā, ka kīia rātou he rākau nā te tika, he mea whakatō nā Ihowā, kia whai korōria ai ia.”

Ihāia 61.1-3

Te Wiki tuawhitu, me ngā Rāhoroi/Hātarei o te Whakaaturanga

Ka mea a Īhu ki te mano, “Ko ahau te taro ora i heke iho i te rangi; ki te kai tētahi i tēnei taro, e ora tonu ia. Āe rā, ko te taro e hoatu e ahau ko ōku kikokiko, e hoatu e ahau hei oranga mō te ao.”

Hoani 6.51

Te Waiata a te Puhi Tapu, a Meri

Kīanga mō ngā rā noa iho

Ka whakanui tōku wairua i a koe, e tāku Atua, •
he tapu hoki tōu ingoa.

Kīanga mō te wā o te Whakaaturanga, rānei

Nā, tāku pononga, tāku i whiriwhiri ai, •
tāku i aroha ai, tā tōku Wairua i āhuareka ai;
ka waiho e ahau tōku Wairua ki runga ki a ia.

Kīanga mō ngā rā o ngā Kaiwhakaako me ngā Kaipānui whakapono, rānei

Ko rātau ka whakaritea me whakaakona ngā ture •
ka kīia rātau he nui i te rangatiratanga o te rangi.

Kīanga mō ngā rā o ngā Pihopa, rānei

Pai rawa, e te pononga pai, e te pononga pono, •
pono tāu mahi ki ngā mea ruarua:
māku koe e mea hei rangatira mō ngā mea maha.

Ka whakanui tōku wairua i te Ariki: •

e hari ana tōku wairua ki te Atua, ki tōku Kaiwhakaora;

Mōna i titiro ki te iti o tāna pononga: •

tā te mea hoki kātahi ahau ka kīia e ngā whakatupuranga katoa

e haere ake nei, he wahine hari.

He nui hoki ngā mahi a te Mea Kaha ki ahau: •

he tapu hoki tōna ingoa.

He mahi tohu tāna ki te hunga e wehi ana ki a ia: •

ki tēnei whakatupuranga, ki tēnei whakatupuranga.

Kua whakaputaina he kaha e ia, arā e tōna ringa: •

nāna te hunga whakakake i marara ai, i te whakaaro
o ō rātou ngākau.

Kua whakatakā e ia ngā piriniha i ō rātou torōna: •

ā, whakateiteitia ake ana te hunga iti.

Kua whakakīia e ia te hunga mate hiakai ki ngā mea pai: •

kua tonoa kautia atu ana te hunga taonga.

Kua tautokona e ia a Īharaira, tāna pononga: •

he whakamahara hoki ki tāna mahi tohu.

Ki a Āperahama rātou ko tāna whānau ake tonu atu: •

pērā hoki me tāna i kōrero ai ki ō tātou mātua.

Ruka 1.46-55

Kia whakakorōriatia te Matua, te Tama; •

me te Wairua Tapu;

ko te ritenga ia i te tīmatanga, ā tēnei anō ināiane; •

ā ka mau tonu iho, ā ake ake. Āmine.

ko tēnei rānei

Korōria ki te Matua, ki te Tama,

ki te Wairua Tapu; •

mai i te tīmatanga, ki tēnei wā,

ā, haere ake nei. Āmine.

Kiānga anō

Ngā Īnoi

Ngā ĩnoi takawaenga me ngā whakawhetai.

E te Ariki, kia aroha mai.

E te Karaiti, kia aroha mai.

E te Ariki, kia aroha mai.

Te Īnoi mō te rā, te ĭnoi mō te Rāpare/Tāite te ĭnoi mō te Whakaturanga rānei

Te Īnoi mō te Rāpare/Tāite

E Īhu, mārama o te ao,
kia tū tōu whetū mārama ki runga i te wāhi
e noho ai te rawa kore;
arahina ō mātou tohunga kia whakaaronui ai,
ō mātou rangatira kia aroha ai.
Āmine.

Te Īnoi mō te Whakaaturanga

E Īhu, i a mātou e haere tawhiti ana, tere ana,
arahina whakamuritia ō mātou mahara
ki te kāhui whakaaro nui e whai ana i tōu whetū,
whakamua anō hoki ki te rā
e kite ai te katoa i tōu mārama pīrata.
Āmine.

Te Īnoi a te Ariki

E tatari ana mō te whakakotahi o ngā iwi o te ao, ā,
kua akona nei tātou e tō tātou Ariki, ka ĭnoi tātou.
E tō mātou Matua i te rangi
 Kia tapu tōu Ingoa.
 Kia tae mai tōu rangatiratanga.
 Kia meatia tāu e pai ai
ki runga ki te whenua,
 kia rite anō ki tō te rangi.
Hōmai ki a mātou āiane
 he taro mā mātou mō tēnei rā.
Murua ō mātou hara,
 Me mātou hoki e muru nei
 i ō te hunga e hara ana ki a mātou.
Aua hoki mātou e kawea kia whakawaia;
 Ēngari whakaorangia mātou i te kino;
Nōu hoki te rangatiratanga, te kaha,
 me te korōria,
Ake ake ake. Āmine.

Te manaakitanga

Kia tau ki a tātou katoa
te atawhai o tō tātou Ariki, o Īhu Karaiti,
me te aroha o te Atua,
me te whiwhinga tahitanga ki te Wairua Tapu,
ake ake. Āmine.

I te wā o te Whakaaturanga, ko tēnei rānei:

E te Karaiti, te Tama a te Atua, whakakoatia ō mātau ngākau ki te rongopai o
te Rangatiratanga o te Atua.
Āmine.

Kia whakapaingia te Ariki.
Ki te Atua ia te whakawhetai.